

## **Governu Submete Ona Proposta Lei OJE 2020 ba PN**



Ministra Finansa ein ezersísiu, Sara Lobo Brites. Foto: Media MF.

**DILI, 15 outubro 2019 (TATOLI)** – Governu liuhosi Ministra Finansa ein ezersísiu, Sara Lobo Brites, hamutuk ho Ministru Reforma Lejizlativa no Asuntu Parlamentár, Fidelis Leite Magalhães, submete ona Proposta Lei Orsamentu Jerál Estadu (OJE) ba Parlamentu Nasionál (PN) hodi diskute.

“Ohin ami mai submete Proposta Lei Orsamentu Jeral Estadu 2020 ba Parlamentu Nasionál, akompaña mós ho dokumentu suplementár sira”, tenik Sara Lobo iha resintu PN.

Maski nune’e, Governante ne’e informa, dokumentu suplemetár sira maka hanesan livru 1 panorama orsamentu, livru 3 A, B, C, livru 4,5,6,7, no livru 2 hanesan livru ne’ebé deskreve kona-ba planu asaun anual ne’ebé Ministériu Finansa serbisu hamutuk ho Unidade Planeamentu Monitorizasaun no Avaliasaun (UPMA) sei aprezanta iha loron 21 outubro.

“Ida-ne’e orsamentu tuir kalendáriu normál. Loron hirak liubá, Prezidente Parlamentu mós estabelese ona kalendáriu indikativu ida-ne’ebé tuir reuniaun ho komisaun sira sei realiza iha 22 outubro to’o 20 novembru.”, nia akresenta.

Iha fatin hanesan, Prezidente Patlamentu Nasionál Arão Noé de Jesus da Costa Amaral, hateten PN simu ona Proposta OJE 2020 ho montante biliaun \$1,950.

“Orsamentu Jerál Estadu 2020 no mós planu levantamentu hosi Fundu Petrolíferu biliaun \$1,4 no restu hosi saldo 2019 hanesan-ne’e mós ho tasa doméstika-nian no mós impréstimu-nian maka deskreve iha ne’ebá,” nia haktuir.

Tuir ajenda ne’ebé iha, aban haruka ona ba parte tekniku hafoin remata intrega hikas iha 21 outubro, no baixa ba komisaun hotu no loron 22 outubro no komesa audiésia komisaun durante fulan ida nia-laran.

“Komisaun-nian hotu mak ami foin tama fali ba jeneralidade, tuir kalendáriu sei to’o 10 dezembru maka aprovasaun finál no 11 dezembru maka sei haruka ona ba Prezidente Repúblika”, nia akresenta.

## OJE 2020 Iha Prioridade Lima



Ministra Finansa em ezersisiu, Sara Lobo Brites. Foto António Goncalves

**DILI, 15 outubru 2019 (TATOLI)** – Ministra Finanzas ein ezersísiu, Sara Lobo Brites, hateten iha Orsamentu Jerál Estadu (OJE) 2020, Governu iha prioridade lima maka sei dezenvolve iha tinan-oin.

“Orsamentu 2020 ita iha prioridade lima hanesan kapitál sosiál no *bem estar* ba sosiedade, protesaun sosiál, sidania atu haree tau osan uitoan ba sidadaun joven sira ne’ebé sente pertense ba Estadu, dezenvolvimentu ekonómiku no konektividade ne’ebé sei ko’alia kona-ba estrada no ikus liu konsolida ita-nia seguransa no defeza sira, relasaun internasionál no hametin justisa iha ita-nia rain”, dehan governante ne’e.

Nia subliña, iha área sektorál, prioridade liu iha saúde, agrikultura no edukasaun maka hetan atensaun maka’as liu.

Sara Lobo dehan tan, iha área infraestrutura, Governu nafatin tau atensaun ba estrada no bee-moos tamba liga ho *bem estar* povu-nian.

**Jornalista: Hortençio Sanchez**

**Editór: Xisto Freitas**